



Ika-Napulo'g Walo nga Dominggo
sa Kasarangang Panahon
Agosto 3, 2014

Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon

Ang Simbahan sa Kabus, Pinaagi sa Gagmayng Simbahanong Katilingban, dili mahibulag kang Kristo kon ang iyang pagsaulog sa Ekaristiya, ang iyang gugma nga nagbuhat ug hustisya ug ang iyang pakighiusa sa mga kabus sa ilang proyekto alang sa mas maayong kinabuhi sa ilang uyukan gilambigit nga usa ra!

Karon mao usab ang Dominggo ni San Juan Baptiste Marie Vianney. Atong i-ampo ilabi na ang mga kaparian, ug ang una ug mapadayonong pag-umol kanila. Mag-ampo kita nga sila unta maumol ug makakat-on sa mga pagbati sa tawhanong kasingkasing ni Jesus: maloloy-on, mapaubsanon ug komitido sa mga buhat sa Gingharian sa Dios. Mag-ampo kita alang kanila diha sa tawag ni Jesus sa pagtuo. Ang PKP-II nag-ingon:

Ang Tawag ni Jesus Karon

1.b Usa ka Misionaryo ug Hingkod nga Pagtuo

(67) Ang pagtuo nagpadilaab sa usa ka tawo uban sa mainit nga tinguha ni Jesus alang sa kaluwasan sa tanan.

‘Ang gugma ni Kristo nagtukmod kanato,’ nag-ingon si San Pablo. Kini nag-aghat kanato sa misyon, sa pagsangyaw. Sa usa ka dapit si Pablo nagpahinumdom sa iyang kaugalingon, ‘Alaut ako kung dili ako magsangyaw (sa ebanghelyo).’ Ang pagdawat sa tahas ug ang pagsangyaw ngadto sa uban mao ang pagsulay sa tinuod nga pagtuo: ‘Ang tawo nga nasangyawan na magpadayon sa pagsangyaw ngadto sa uban. Dili mahunahuna nga ang tawong motoo sa Pulong ug motahan sa iyang kaugalingon alang sa Gingharian dili mosaksi ug mosangyaw niini sa iyang bahin. ‘

(68) Ang pagtuo gasa sa Dios. Walay makaduol ngadto ni Jesus gawas kon ang Amahan ang modala kaniya. Kon wala si Jesus wala kita’y mahimo. Ug walay maka-ingon ‘si Jesus ang Ginoo’ gawas lamang kon pinaagi sa gahum sa Espiritu Santo. Apan kini nga gasa sa pagtuo usa ka dinamikong kamatuoran. Kini nagkinahanglang motubo. Kinabuhi kini, ug sama sa tanang kinabuhi, dili kini magpabiling magurong. Ang magtotoo maningkamot gayud sa dugang pag-ila ni Jesus, sa dugang kasayuran mahitungod kay Jesus, ug sa pagpaila kang Jesus ngadto sa daghang pang mga tawo. Ang gasa sa pagtuo angay nga mohamtong ngadto sa usa ka pagtuong dinamiko, buhi, ug makahatag-ug-kinabuhi. ■

RITO SA PAGESUGOD

O Dios, dali sa pagtabang kanako; Ginoo, ayaw paglangan. Ikaw ang nagtabang kanako ug nagluwas kanako: O Ginoo, ayaw dugaya ang pag-ari kanako.

P: Sa ngalan sa Amahan ug sa Anak ug sa Espiritu Santo.

K: Amen.

P: Ang Ginoo maanaa kaninyo.

K: Maanaa usab kanimo.

Pasiuna ug Pag-abi-abi

P: Mga Minahal kong mga igsoon: Maayong pag-abot dinhi sa selebrasyon sa gugma ug kinabuhi sa Dios nga manggihatagong gipaambit niya kanatong tanan ug uban sa tanang binuhat. Sa tumang kalipay, atong pasalamatang ang Dios sa gasa sa bokasyon sa pagkapari ug sa pagkamanggihatagon sa mga pari ug sa mga seminarista sa pagtubag sa iyang tawag! Hinaut nga ang pagkapari ni San Juan Vianney mao ang ilang espirituhanon ug pastoral nga panig-ingnan sa ilang pag-alagad sa katawhan sa Dios.

Akto sa Paghinulsol

Mga igsoon, ato karong angkonon ang atong mga sala ug pangayoon ta ang iyang kalooy ug pasaylo kay siya Dios sa gugma ug kaaghop.

P: Ginoong Jesus, gitawag mo kami sa pagtuo kanimo. Pasayloa ang among kakulang sa pagtoo. Ginoo, malooy ka.

K: Ginoo, malooy ka.

P: Ginoong Jesus, ikaw nagtawag kanamo nga mosunod kanimo. Pasayloa ang among katig-a sa kasingkasing. Kristo, malooy ka.

K: Kristo, malooy ka.

P: Ginoong Jesus, ikaw nagtawag kanamo sa pag-alagad sa imong katawhan. Pasayloa ang among pagkahakog. Ginoo, malooy ka.

K: Ginoo, malooy ka.

P: Kaloy-an unta kita sa Dios nga makagagahum sa tanan ug pasayloon ang atong mga sala, dad-on unta kita niya ngadto sa kinabuhing dayon.

K: Amen.

Himaya sa Diyos didto sa langit...

Kolekta

P: Mag-ampo kita: Pahiduol sa imong mga alagad, O Ginoo, ug tubaga ang ilang mga pag-ampo uban sa walay-hunong nga kalooy, aron, alang kanilang naghimaya kanimo nga ilang Magbubuhay ug giya, imong ipasig-uli unsa man gani ang imong gibuhay ug imong panalipdan unsa man gani ang imong gipahiuli. Kini among gipangayo pinaagi sa among Ginoong Jesukristo imong Anak, nga buhi ug hari uban kanimo ug sa Espiritu Santo, Dios nga usa, hangtud sa kahangturan.

K: Amen.

LITURHIYA SA PULONG

Unang Pagbasa: Isaias 55:1-3

L: Pagbasa gikan ni Propeta Isaias

(Basahon gikan sa Kasulatan)

L: Ang Pulong sa Ginoo.

K: Salamat sa Dios.

Komentaryo sa Isaias 55:1-3:

Ang pagpahiuli sa Israel nagsaad usab sa nabag-ong kasabotan. Mamahimo kining usa ka bag-ong paagi sa pagpakinabuhi nga gihulagway sa angay ug patas nga pag-inambitay ug partisipasyon sa mga katawhan diha sa mga gasa sa mga nilalang. Mikanat atubangan sa mga tawo ang mga butang sa kalibutan: silang tanan may kahigayonang mopalambo ug magbahin kanila, sa hustisya ug kaangayan. Ang paghisgut kang David nagpahinumdom sa saad sa Dios ngadto kang David ug sa dinastiya ni David. Apan niining bahina, ang mga

kaayohan nga gipasalig kang David dili na kutob sa usa ka pamilya lamang, apan alang na sa tibook katawhan, sa tanang mga nasud nga modawat sa panig-ingnan sa gipahiuli nga Israel.

Salmo Responsoryo: Salmo 145:8-9, 15-16, 17-18

(Basahon gikan sa Kasulatan)

Komentaryo sa Sal 145:

Kini ang katapusang akrostikong balak sa Basahon sa mga Salmo. Gigamit sa salmista ang pagbalik-balik ug pag-ingon pag-usab isip mga balaknong kahimanan sa pagpadayag sa iyang mensahe. Naganam ug saka ang balaknong kainit ubay sa pagdagan sa tumong gikan sa bahing personal ngadto sa mga kaliwatang sumusunod ngadto sa mga nahigugma sa Dios, ug sa katapusan, ngadto sa tanang may kinabuhi. Ang pagsunodsunod sa panahon nagpamatuod usab niining kalihukan sa pagpakusog sa pagdayeg: sa matag-adlaw hangtud sa kahangturán! Ang tumong sa pagdayeg mao ang Dios, ug ang iyang tanang mga buhat: ang Dios matinud-anon, dili dayon masuko, madagayaon sa kalooy; ang iyang gamhanang mga buhat nga nagatukod sa gingharian nagtuboy sa mga kabus ug sa mga timawa. Haduol siya sa mga tawo nga nagatawag kaniya diha sa kamatuoran.

Ikaduhang Pagbasa: Roma 8:35, 37-39

L: Pagbasa gikan sa sulat ni San Pablo ngadto sa mga taga-Roma

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Roma 8:35, 37-39:

Kining madaugong himno nga gipahinungod sa gugma sa Dios nagkaanam ug kataas sa iyang kainit. Ang

Dios tiunay nga nagdapig sa katawhan ug sa tanang mga binuhat. Gipili niya ang makaluluwas nga pagdapig pinaagi sa pagpadala sa iyang Anak ug sa gasa sa Espiritu Santo. Gihan-ay ni Pablo ang mga posibleng babag batok sa talagsaong gugma sa Dios alang kanato. Adunay mga babag nga may kalabutan sa kalisdanan sa kinabuhi ug sa posibilidad sa kamatayon, sama sa kasakit, o kasubo, paglutos, o gutom, o pagkahubo, o katalagman, o espada. Apan ang iyang laing listahan naglatid ug mas malangkubon ug halawom nga sukdanan: ni kamatayon, ni kinabuhi, ni giladmon, ni mga anghel, ni mga punoan ug uban pang maapil sa panahon, sa wanang ug sa gahum. Ang gugma sa Dios kanato gamhanan kaayo, nga sagad ato kining huptan matag-adlaw hangtud sa kahangturán!

Berso sa Aleluya:

L: **Aleluya, aleluya.** Ang tawo dili mabuhi sa tinapay lamang, kondili sa matag pulong nga nagagikan sa baba sa Dios! L: **Aleluya, aleluya.**

Ebanghelyo: Mateo 14: 13-21

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Mateo.

K: *Himayaon ikaw, O Ginoo.*

(Basahon gikan sa Kasulatan)

P: Ang Ebanghelyo sa Ginoo.

K: *Daygon Ikaw, O Kristo.*

Komentaryo sa Mateo 14: 13-21:

Usa ka kaliwatan molabay, ug ang usa ka bag-o nga kaliwatan mahimugso aron pagkuha sa iyang dapit, niining panahona mas piho kay sa kaniadto, bahin sa iyang papel sa pagtukod sa Gingharian sa Dios. Sa iyang pag-ampo ug sa pagpamalandong aron lig-onon ang iyang halawom nga konbiksyon bahin sa tino nga paglihok alang sa

mga buluhaton sa paghari sa Dios nga mas subsob, mahukmanong misibog ug usa ka lakang si Jesus. Kana nga konbiksyon gisulayan sa pag-ampo ug sa buhat, sa dihang siya mikanaug gikan sa pag-inusara, gisagubang niya ang hulga nga masakpan siya sa mga awtoridad, sa usa ka bahin, ug sa pagbuhat sa hustisya sa mga kabus ug sa mga timawa, sa laing bahin. Gigunitan niya kining duha. Gipakita niya nga ang pagsaulog sa Eukaristiya, ang akto sa paghatag sa kaugalingon ug ang pagbuhat sa hustisya dinhi ug karon dili mabulag. Pinaagi sa pagsaulog sa Eukaristiya, pinaagi sa usa ka lawom nga gugma sa pagbuhat sa hustisya ug pinaagi sa panaghiusa diha sa pakigbisog lalang sa may maayong kinabuhi sa tawo dinhi sa kalibutan, si Jesus ug ang iyang mga tinun-an ug ang Kristohanong Katilingban nga mosunod, makasaksi ug makasinati sa kadagayaon sa gugma sa Dios, sa grasya sa mamugnaong pagkamabungahon sa katawhan, sa temporaryo nga mga kadaugan sa tawhanong kalingkawasan karon ug sa hingpit nga kaluwasan diha sa gingharian sa Dios.

Please help us continue publishing this Missalette with your donation.

Any amount is appreciated no matter how small.

Thank you!

Account Name:

Communication Foundation for Asia

Metrobank V-Mapa, Sta. Mesa,

Manila Branch:

SA# 3306-509-480

BDO Old Sta. Mesa Road, Manila Branch:

SA# 7090-042-836

Please fax deposit slip to 713-2736

We are located at # 4427 Old Sta. Mesa St., Sta. Mesa, Manila

Wali: Ang Simbahan sa Kabus, pinaagi sa Gagmayng Simbahanong Katilingban, dili mahibulag kang Kristo kon ang iyang pagsaulog sa Eukaristiya, ang iyang gugma nga nagbuhat ug hustisya ug ang iyang pakighiusa sa mga kabus sa ilang proyekto alang sa mas maayong kinabuhi sa ilang uyukan gilambigit nga usa ra!

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/Panawagan/Hagit
<p>Ang Simbahan sa Kabus, pinaagi sa Gagmayng Simbahanong Katilingban, dili mahibulag kang Kristo kon ang iyang pagsaulog sa Eukaristiya, ang iyang gugma nga nagbuhat ug hustisya ug ang iyang pakighiusa sa mga kabus sa ilang proyekto alang sa mas maayong kinabuhi sa ilang uyukan gilambigit nga usa ra!</p>	<p>Hinganli ang pipila ka mga buhat sa gugma nga nagbuhat sa hustisya nga gihimo nimo ug sa imong GSK diha sa inyong parokya, sa inyong katawhan. Hinganli ang konkretong mga programa ug mga pagpangalagad diha sa inyong GSK ug sa parokya nga nagpadayag sa inyong panaghiusa uban sa mga kabus sa pagpangita alang sa usa ka mas maayong kinabuhi. Gisaulog ba ninyo kining nga mga buhat sa gugma ug panaghiusa diha sa Eukaristiya?</p>	<p>“Kini mao ang Eukaristiya - ang usa ka sakramento sa iyang (ni Jesus) kinabuhi, nga gihalad ngadto sa Dios ug gihatag ngadto sa katawhan, aron ang iyang mga tinun-an makakat-on sa pagpuyo ug pagpakamatay ingon sa iyang gibuhat.” (PKP-II, 55).</p>

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo

P: Mga igsoon, ibayaw nato karon sa makausa pa ang atong mga hunahuna ug mga kasingkasing, ang tibuok natong kaugalingon ngadto sa Dios, ug mangamuyo kita kaniya nga ihatag niya kanato ang mga panalangin nga atong gikinahanglan. Sa matag pag-ampo, ang atong tubag: Ginoo, kabiga kami nga maduol diha kanimo ug sa usag-usa.

T: Ginoo, kabiga kami nga maduol diha kanimo ug sa usag-usa.

L: Mag-ampo kita alang sa Simbahan: nga isip usa ka Simbahan sa Kabus sa tibuok kalibutan, siya dili gayud mabulag gikan kang Cristo tungod kay ang iyang pagsimba sa Eukaristiya, ang iyang gugma nga nagabuhay sa hustisya ug ang iyang panaghiusa uban sa kabus sa ilang proyekto alang sa usa ka mas maayong kinabuhi lintunganay nga gilambigit isip usa ra. Mag-ampo kita sa Ginoo.

T: Ginoo, kabiga kami nga maduol diha kanimo ug sa usag-usa.

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip katawhan sa Dios: nga, dinasig sa Espiritu Santo, sila maumol sumala sa mga pagbati sa kasingkasing ni Jesus: mahigugmaon, matarung ug malumo, ug sila mahimo nga mga ministrong pastoral sa hustisya ug sa kalinaw ug sa pagpanalipod sa integridad sa mga linalang. Mag-ampo kita sa Ginoo.

T: Ginoo, kabiga kami nga maduol diha kanimo ug sa usag-usa.

L: Alang sa mga pangulo sa kalibutan ug sa tanang gitugyanan sa kagamhanan ug pagdumala sa mga butang sa kalibutan: nga sila magkahiusa sa pag-andam ug sa pagpausbaw sa kalinaw dili sa gubat, nga sila mamahimong mga alagad sa hinungdan sa hustisya ug sa gugma, dili sa in hustisya, kapintas ug pagdumot. Mag-ampo kita sa Ginoo.

T: Ginoo, kabiga kami nga maduol diha kanimo ug sa usag-usa.

L: Alang kanatong tanan, mga lumulupyong sa kalibutan ug mga lungsoranon sa langit: nga kita magdinasigay sa usag-usa nga makiglambigit sa mga kalihokan sa kalibutan, sa pagbarug sa unsay maayo ug matarung, mahigugmaon ug maloloy-on, ug nga kita mag-inunungay alang sa kausaban sumala sa diwa sa ebanghelyo. Mag-ampo kita sa Ginoo.

T: Ginoo, kabiga kami nga maduol diha kanimo ug sa usag-usa.

L: Alang sa mga hinigugma natong nipanaw na: nga sa kapasayloan sa ilang mga sala, sila makakaplag sa walay katapusang pagpahulay diha sa kasingkasing sa atong Ginoo ug Manluluwas nga si Hesukristo. Mag-ampo kita sa Ginoo.

T: Ginoo, kabiga kami nga maduol diha kanimo ug sa usag-usa.

L: Alang sa atong espesyal nga mga tinguha, diha sa kahilom sa atong kasingkasing. (*mohilum kadiyot*)
...Mag-ampo kita sa Ginoo.

T: *Ginoo, kabiga kami nga maduol diha kanimo ug sa usag-usa.*

P: Ginoong Dios, mao kini ang mga pag-ampo nga among gihalad kanimo karon. Kami nangamuyo kanimo nga ihatag mo sila kanamo pinaagi sa paghimo kanamo nga matandog sa tanang mga singgit sa tawhanong kasingkasing, ilabina sa kabus, ug sa tanang mga binuhat, ug pinaagi sa paghimo kanamo nga mga instrumento sa imong gugma ug kalomo, kalooy ug hustisya, kalinaw ug ang pag-atiman sa tanang mga binuhat. Kini among gipangayo pinaagi ni Kristo among Ginoo.

T: Amen.

LITURHIYA SA EUKARISTIYA

Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa khangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa khangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa

iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: O Ginoo, manggihatagon, santosa kining mga gasa, kami naga-ampo, ug, sa pagdawat niining halad sa espirituhanong sakripisyo, maghimo kanamo nga gasa nga tunhay alang kanimo. Kini among gipangayo pinaagi ni Kristo among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos.

Kay pinaagi sa kalooy sa among pagkahisalaag, siya nagpaubos sa iyang kaugalingon, ug gipakatawo gikan ni Maria nga Birhen; pinaagi sa iyang pasyon sa Krus, giluwat kita niya gikan sa walay katapusang kamatayon, ug sa iyang pagkabanhaw gikan sa mga minatay, mihatag siya kanato sa kinabuhing walay katapusan.

Ug busa, uban sa mga Anghel ug mga Arkanghel, sa mga trono ug mga kagamhanan, ug sa tanan nga mga panon ug gahum sa langit, maga-awit kami sa himno sa imong himaya, ug sa walay katapusan kami magpasidnungog:

Santos

K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Luwasa kami, Manluluwas sa kalibutan, kay pinaagi sa imong Krus ug Pagkabanhaw imo kaming giluwat.

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalanon namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonaa luwasa kami sa dautan.

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot

kami nga malaumon sa pagbalik ni JesuKristo, among manunubos.

K: Kay imo man ang gingharian/ug ang gahom ug ang himaya/hangtod sa kahangturan.

P: Ginoong JesuKristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panaginigsoonay.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Antipona sa Pagpangalawat:

Imong gihatag kanamo, O Ginoo, ang pan nga gikan sa langit, gitugahan uban sa tanan nga kalipayan ug sa katam-is sa matag lami.

Pag-ampo Human sa Pangalawat

P: Mag-ampo kita: Duyogi uban sa kanunay mong pagpanalipud, O Ginoo, kadtong imong gibag-o pinaagi niining langitnong mga gasa ug sa imong dili gayud mapakyas nga pag-atiman kanila, himoa silang takus sa walay katapusang pagtubos. Pinaagi ni Kristo among Ginoo.

K: Amen.

Katapusang Panalangin:

P: Ang Ginoo maanaa kaninyo.

K: Maanaa usab kanimo.

P: Iduko ang atong ulo alang sa panalangin: Tultoli ang imong katawhan, O Ginoo, kami naga-ampo, pinaagi sa langitnong pagtulon-an, nga pinaagi sa paglikay sa tanan nga mga dautan ug sa pagpadayon sa pagpangita sa tanan nga maayo, sila makaangkon dili sa imong kasuko kondili sa imong walay katapusang kalooy. Pinaagi kang Kristo nga among Ginoo.

K: Amen.

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: Amen.

Pagpanglakaw

P: Panglakat kamo ug isangyaw ang maayong balita sa Ginoo.

K: Salamat sa Dios. ■

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo.

Bisitaha ang gospelbreak.wordpress.com. o pinagi sa inyong smartphone o tablet i-swipe kini nga QR code.



**Ang
Simbahan sa
Kabus, pinaagi
sa Gagmayng
Simbahanong
Katilingban,
dili mahibulag
kang Kristo
kon ang iyang
pagsaulog sa
Eukaristiya,
ang iyang
gugma nga
nagbuhat ug
hustisya ug ang
iyang
pakighiusa sa
mga kabus sa
ilang
proyekto
alang sa mas
maayong
kinabuhi sa
ilang uyukan
gilambigit nga
usa ra!**